

Muhammad Qusyairi bangga berkerja di syarikat antarabangsa PwC



Bergiat aktif dalam bidang kokurikulum sepanjang bergelar mahasiswa merupakan satu kelebihan yang harus dimanfaatkan sebaiknya. Anak kelahiran Pulau Pinang, Muhammad Qusyairi Hashim menjadikan Universiti Malaysia Pahang (UMP) sebagai pilihan utama bagi menyambung pengajian kerana lokasi UMP yang menarik perhatian beliau.

Dalam kesibukan bekerja dan menjawat jawatan sebagai Audit Associates di firma perakaunan PricewaterhouseCoopers (PwC) Malaysia, tidak menghalang beliau menjadikan hobi *backpacking* sekurang-kurangnya sekali setahun sebagai hobi.

Dalam usia mencecah 25 tahun, beliau berbangga kerana dapat berkerja di PwC yang merupakan syarikat antarabangsa yang beribu pejabat di London, United Kingdom dan mempunyai banyak cawangan di merata dunia.

Beliau bukan sahaja cemerlang dalam bidang akademik, malah beliau juga bergiat aktif dalam bidang kokurikulum. Beliau merupakan salah seorang pendebat universiti dan pernah menjadi Johan Pertama Debat Gender peringkat Kebangsaan 2012, Johan Debat Gender peringkat Kebangsaan 2013, Johan Liga Pertandingan Debat Keamanan 2013 dan Pendebat Terbaik Keseluruhan Debat Diraja 2012.

Bukan itu sahaja, beliau juga pernah menjadi Presiden Fakulti Sains & Teknologi Industri (FSTI), Presiden Kelab UNESCO (UMP-Chapter), Wakil Malaysia untuk 1UMP 1World Club dan Junior Office, Pejabat Antarabangsa, UMP.

Beliau yang memperoleh ijazah Sarjana Muda Sains Gunaan (Kepujian) Kimia Industri dari FSTI mengakui, beliau sebenarnya beralih bidang daripada Sains Industri ke bidang

Kewangan dan Perakaunan.

“Di PwC Malaysia, kami mengamalkan kepelbagaian. Walaupun kini saya terlibat dalam bidang kewangan, disebabkan kelayakan saya dalam bidang Sains Industri, saya diberikan pengkhususan dalam bidang tenaga, petroleum dan kejuruteraan,” katanya.

Anak kedua daripada tiga orang adik-beradik dan dilahirkan pada 7 April 1991 berharap UMP suatu hari nanti mampu menjadi antara universiti terbaik peringkat rantau Asia dengan pelbagai kemudahan serta kompetensi tenaga pengajar.

Katanya, pendekatan *practically* di UMP berjaya membantu pelajar kerana kebanyakan peralatan di UMP bertaraf industri sekali gus memudahkan pelajar untuk adaptasi dalam alam pekerjaan.

“Saya merupakan antara generasi pertama yang diberikan peluang untuk menggunakan Makmal Berpusat di UMP.

“Bagi saya dari segi kemudahan untuk akademik, UMP merupakan antara makmal di Pantai Timur yang mempunyai peralatan yang lengkap. Dari segi tenaga pengajar, UMP mempunyai keseimbangan antara pensyarah yang mempunyai pengalaman lebih 15 tahun dan pensyarah muda yang saya rasakan berjaya membantu para siswazah,” katanya.

Selain itu, sewaktu menyandang jawatan *Junior Officer* di Pejabat Antarabangsa dan melaporkan tugas kepada Pengarah Pejabat Antarabangsa ketika itu, beliau telah diberikan pelbagai peluang yang dirasakan sangat berharga dalam membentuk diri beliau pada hari ini.

Contohnya, beliau dipertanggungjawabkan membentangkan kertas kerja Program Pejabat Antarabangsa kepada Timbalan Menteri Pendidikan Tinggi ketika itu.

Selain itu, beliau juga diberikan peluang menguruskan pelajar antarabangsa melalui 1UMP, 1World Club yang mana beliau merupakan wakil delegasi Malaysia.

Tambahnya, peluang-peluang inilah yang membantu beliau dalam menjalankan tugas beliau pada hari ini. “Ini kerana, saya kini dipertanggungjawabkan untuk menguruskan klien syarikat dari negara luar seperti Perancis, United Kingdom, Amerika Syarikat, Indonesia, Thailand, dan Arab Saudi.

“Dalam alam pekerjaan, kita perlu wujudkan fokus utama kita bekerja. Adakah sekadar mencukupi untuk menampung hidup atau kita mahukan lebih dari itu, sebagai contoh, untuk pergi lebih jauh dalam kerjaya kita?”

“Perkara utama yang saya amalkan di tempat kerja adalah kesediaan untuk bergerak ke hadapan. Sebagai contoh, buat masa sekarang, saya sedang melengkapkan pengajian saya dalam bidang perakaunan secara separuh masa dengan mengambil peperiksaan dan kelas *Association of Chartered Certified Accountant* (ACCA) dan insya-Allah, selepas tamat pengajian, saya bercadang untuk menyambung pelajaran saya untuk mendapatkan *Masters of Business Administration* (MBA),” katanya.

Tambah beliau sebelum mengakhiri wawancara, seandainya ada mahasiswa UMP yang mahu mengikut jejak langkah beliau, perkara utama yang penting adalah kesediaan.

“Bekerja dalam bidang ini menuntut seseorang meluangkan lebih banyak masa dan waktu berbanding waktu kerja biasa. Pada masa yang sama, seseorang itu perlulah bersedia bagi berurusan dengan pelbagai jenis klien daripada banyak negara dan industri,” ujar beliau.